

Te Kea Matekai

nā Ratu Tibble

Amokura

He Whakatau

Me mātua pānui kia marama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. I kite te kea i tētahi wāhi puni. He aha te kai pai ki a ia?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

He aha ōu mōhio mō te kea? He aha te āhua o te kea?

Matapakia ngā kai pai me ngā kai kore pai mō te tinana.

He Matapaki

Tirohia te pai o te pānui a te ākonga

I te wā o te matapaki me pānui te ākonga te katoa, tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tataua i ngā hē), te rere o te reo;
- titiro mēnā e marama ana mā te whai i tētahi o ngā huarahi e whai ake nei:
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuratanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapai hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te kaupapa o tēnei pukapuka?
2. He aha te kai pai ki a ia?
3. Ka aha te puku o te kea?
4. Ka aha mēnā ka kai koe i ērā tūmomo kai katoa?
5. Ki ōu whakaaro, he pai te kai i ngā keke me te tiakarete? He aha ai?

Ngā whakautu ki ngā whakapuaki māramatanga

1. He kōrero mō tētahi kea matekai.
2. Ngā kai katoa.
3. Ka nui haere, ka mate te puku rānei o te kea.
4. Ka mate tō puku.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuratanga o te pukapuka nei.

Te pūtake

T He tāutu i tētahi raupapatanga.

He whakatakinga ā-roro, he whakaharatau

Matapakia ngā kupu hou i kitea e te ākonga i roto i te kōrero. He aha tēnei mea ko te “matekai”?

Kia ōti i te ākonga te pānui pukapuka, kōrero mō ngā kai i matepuku ai te kea.

Matapakia ētahi momo kai e mau ai i te tauira, nā, ka haere hopuni ia. Matapakia ngā momo kai aua a te kea. Matapakia ngā huapai, huakino hoki o ngā kai. Matapakia ētahi atu manu māori.